



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e – mail: info@voda.ba

Broj: **UP-1/21-3-40-470-3/24**
Datum: **04.10.2024. godine**

„Agencija za vodno područje rijeke Save“ Sarajevo rješavajući po zahtjevu pravnog lica „BELAMIONIX“ d.o.o. Brčko, za izdavanje vodne dozvole za ispuštanje oborinskih onečišćenih voda sa lokacije objekta benzinske stanice sa pratećim sadržajima, izgrađenog u Plješevičkoj ulici, naselje Kamenica, Grad Bihać, na osnovu člana 109. stav (1) Zakona o vodama („Službene novine Federacije BiH“, broj 70/06) i člana 200. stav (1) Zakona o upravnom postupku („Službene novine Federacije BiH“, broj 2/98 i 48/99), donosi:

RJEŠENJE o vodnoj dozvoli

1. Daje se vodna dozvola pravnom licu „BELAMIONIX“ d.o.o. Brčko, za ispuštanje onečišćenih oborinskih voda sa lokacije objekta benzinske stanice sa pratećim sadržajima, izgrađenog u Plješevičkoj ulici, naselje Kamenica, Grad Bihać, na zemljištu označenom kao k.č. broj: 2519/1 K.O. Kralje (podaci novog premjera), Grad Bihać.
2. Ova vodna dozvola ne oslobađa podnosioca zahtjeva obaveze pribavljanja vodne dozvole za zahvatanje vode i ispuštanje sanitarnih otpadnih voda, za čije je izdavanje nadležno Ministarstvo poljoprivrede vodoprivrede i šumarstva Unsko-sanskog kantona, u skladu sa članom 139. stav (2) tačka 1. i 2. Zakona o vodama.
3. Vodna dozvola se daje na osnovu činjeničnog stanja utvrđenog pregledom dostavljene dokumentacije i izvršenim uviđajem na objektu, pod slijedećim uslovima:
 - 3.1. Da korisnik predmetnog objekta benzinske stanice sa pratećim sadržajima, isti održava u funkcionalnom stanju i koristi u skladu sa njegovom prirodom i namjenom te u skladu sa uslovima iz ove vodne dozvole.
 - 3.2. Skladištenje nafte i naftnih derivata vršiti u podzemnim dvoplašnim rezervoarima, ukupnog kapaciteta 70 m³ (60+10 m³), sa primjenom sistema automatske dojava o procurenju međuplašnog prostora.
 - 3.3. Skladištenje i pretakanje nafte i naftnih derivata kao i ispitivanje ispravnosti i propusnosti rezervoara za skladištenje goriva vršiti u skladu sa Zakonom o naftnim derivatima u Federaciji Bosne i Hercegovine (Službene novine Federacije BiH br. 52/14) i propisima iz ove oblasti, a na način da se spriječi dospijevanje nafte i naftnih derivata u podzemne i površinske vode.
 - 3.4. Da se istrošena ulja, nauljene krpe i sav opasan otpad koji se koristi u procesu čišćenja i održavanja objekata i postrojenja redovno prikuplja i propisno, privremeno skladišti u metalne spremnike, do krajnjeg, ekološki prihvatljivog zbrinjavanja od strane ovlaštene organizacije, a prema sačinjenom ugovoru.
 - 3.5. Da korisnik predmetnog objekta, za vrijeme trajanja ove dozvole, obezbjeđuje da se onečišćene vode sa saobraćajnih i pretakališnih površina nesmetano sakupljaju i odvođe do objekta predviđenog za tretman tehnoloških otpadnih voda (separator ulja i masti), a zatim tretirane vode ispuštaju u recipijent.
 - 3.6. Objekte za prikupljanje, tretman i ispuštanje onečišćenih otpadnih voda (slivnici, rešetke, kanalizaciona mreža, separator ulja i masti, i dr.) potrebno je održavati i koristiti na takav način koji će obezbijediti njihovu potpunu ispravnost i funkcionalnost. Čišćenje i pražnjenje separatora ulja i masti, može vršiti isključivo firma ovlaštena za tu vrstu djelatnosti, prema sklopljenom ugovoru. O načinu i vremenu radova održavanja, odnosno o pražnjenju, odvozu i zbrinjavanju sadržaja taložnika i separatora ulja i masti, neophodno je voditi službenu evidenciju i arhivu.

- 3.7. Korisnik objekta je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz okna za monitoring u skladu sa Uredbom o uslovima ispuštanja otpadnih voda u okoliš i sisteme javne kanalizacije. Učestalost i način ispitivanja vršiti u skladu sa članom 20. Uredbe, a rezultate analiza dostaviti ovoj Agenciji. Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlasti («Službene novine Federacije BiH», broj 14/10, 14/13, 26/14, 23/17 i 41/20).
- 3.8. U toku važenja ovog Rješenja, korisnik predmetnog objekta je obavezan poduzeti sve potrebne mjere kako bi kvalitet oborinskih onečišćenih voda, a prije ispuštanja u recipijent, zadovoljio granične vrijednosti emisije definisane u članu 14. Uredbe o uslovima ispuštanja otpadnih voda u okoliš i sisteme javne kanalizacije.
- 3.9. Osigurati priručna sredstva za brzu intervenciju u slučaju nekontrolisanog istjecanja nafte i naftnih derivata, kako bi se spriječilo moguće onečišćenje voda i tla (piljevina, prikladni apsorbenzi, odgovarajuće posude, uređaji za pretakanje i sl.).
- 3.10. Talog iz separatora se ne smije ni privremeno odlagati na česticu „vodno dobro“, odnosno u vodotoku i na njegove obale.
4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama („Službene novine Federacije BiH“, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH“, broj 92/07, 46/09, 79/11 i 88/12), Prilog 1, Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
5. U periodu važenja ove dozvole, korisnik „BELAMIONIX“ d.o.o. Brčko je dužan provoditi sve mjere i aktivnosti propisane istom.
6. Ukoliko radom predmetnog objekta dođe do promjene režima površinskih i/ili podzemnih voda, a te promjene prouzrokuju štete ma kakvog karaktera, korisnik vodne dozvole je obavezan uzroke štete otkloniti, a nastalu štetu nadoknaditi.
7. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
8. Ova vodna dozvola, shodno članu 117. stav (1) Zakona o vodama („Službene novine Federacije BiH“, broj 70/06) se daje sa rokom važenja od 5 (pet) godina, od dana izdavanja ovog rješenja.
9. Prije isteka važnosti ove dozvole, Investitor je dužan da podnese zahtjev za izdavanje nove vodne dozvole.
10. Ovo rješenje o vodnoj dozvoli može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

O b r a z l o ž e n j e

Pravno lice, „BELAMIONIX“ d.o.o. Brčko, obratilo se ovoj Agenciji dana 3.9.2024. godine (zaprimljen dana 9.9.2024. godine) zahtjevom, broj: 251/24, za izdavanje vodne dozvole za ispuštanje onečišćenih oborinskih voda sa lokacije objekta benzinske stanice izgrađenog u Plješevičkoj ulici, naselje Kamenica, Grad Bihać, na zemljištu označenom kao k.č. broj: 2519/1 (podaci novog premjera), K.O. Kralje, Grad Bihać.

U provedenom postupku, uz zahtjev za izdavanje vodne dozvole dostavljena je i pregledana slijedeća dokumentacija:

- Aktuelni izvod iz sudskog registra; izdano dana 21.5.2024. godine, od strane Osnovnog suda Brčko distrikta BiH pod brojem 096-0-RegZ-24-001591 (ovjerena kopija),
- Potvrda o registraciji – identifikacioni broj poreskog obveznika, izdano dana 01.06.2006. godine, od strane Poreske uprave Brčko distrikta Bosne i Hercegovine (ovjerena kopija),

- Uvjerenje o registraciji/upisu u Jedinostveni registar obveznika indirektnih poreza, broj: 04/1-17-1-UPJR/1-7637-2/12, izdano od strane Uprave za indirektno – neizravno oporezivanje Bosne i Hercegovine dana 14.02.2013. godine, u Banjaluci (ovjerena kopija),
- Nalog za plaćanje upravne pristojbe (kopija) i 3 KM federalne administrativne takse,
- Rješenje o vodnoj dozvoli, kojim se daje vodna dozvola pravnom licu „BELAMIONIX“ d.o.o. Brčko, za promet opasnih materija kao i proizvoda od tih materija koje nakon upotrebe dopijevaju u vode te ispuštanje onečišćenih oborinskih voda sa lokacije objekta benzinske stanice sa pratećim sadržajima izgrađenog u Plješevičkoj ulici, naselju Kamenica, Grad Bihać, na zemljištu označenom kao k.č. broj: 2119/1 K.O. Kralje (novi katastarski operat), Grad Bihać; izdano od strane Agencija za vodno područje rijeke Save Sarajevo pod brojem UP-I/25-3-40-422-8/19, dana 25.09.2019. godine (kopija),
- Glavni projekat sakupljanja, tretmana i prečišćavanja otpadnih voda benzinske pumpe „BELAMIONIX“ u Bihaću; urađen od strane Instituta za kvalitet, standardizaciju i ekologiju TQM d.o.o. Lukavac pod brojem 10-06/19, februara 2019. godine, u Lukavcu, revidiran od strane „Euroing“ d.o.o. Bihać pod brojem REV 04-03/19, dana 05.03.2019. godine, u Bihaću (na uvid, vraćen podnosiocu zahtjeva pri izvršenju uviđaja na objektu).

Nakon pregleda dostavljene dokumentacije, u skladu sa članom 12. stav (5) i (6) Pravilnika o sadržaju, obliku, uvjetima i načinu izdavanja i čuvanja vodnih akata, izvršen je pregled izgrađenog poslovnog objekta benzinske stanice sa pratećim sadržajima i tom prilikom sačinjen zapisnik o uviđaju broj: UP-1/21-3-40-470-2/24 od 30.9.2024. godine.

Na osnovu dostavljene dokumentacije i izvršenog uviđaja na licu mjesta utvrđeno je slijedeće:

Objekat benzinske stanice sa pratećim sadržajima „BELAMIONIX“ d.o.o. Brčko, je lociran u Plješevičkoj ulici, naselju Kamenica, sa lijeve strane magistralne ceste M5, na dionici puta Bihać – GP Izačić.

Objekt se sastoji od nadstrešnice sa automatima za istakanje goriva, maloprodajnog objekta sa sanitarnim čvorom i upravnim prostorijama, zelene površine, ukopanih spremnika za gorivo, uređaja za tretman otpadnih voda, te manipulativnog asfaltiranog prostora i betoniranih površina za pretakanje goriva. Objekt se nalazi na terenu u blagom nagibu, čije su interne saobraćajne i pretakališne površine niže od trupa magistralne ceste. Na prelazu sa internih saobraćajnih površina na površinu za pretakanje goriva su ugrađene linijske slivne rešetke, koje kupe zauljenu otpadnu vodu, te je odvođe do uređaja za prečišćavanje, odnosno, separatora ulja i masti, iz kojeg se prečišćena voda ispušta u postojeći zacjevljeni kanal, koji se neposredno nakon toga ulijeva u korito potoka Mrežnica, koji protiče u neposrednoj blizini predmetnog objekta.

Gorivo se drži uskladišteno u ukopanom spremniku sa dvostrukom stjenkom, za dizel i benzinske gorivo kapaciteta 60 m³ te podzemnog spremnika za tečni nafni gas, kapaciteta 10 m³. Za ugrađene spremnike podnosilac zahtjeva je priložio atestnu dokumentaciju.

Sanitarne otpadne vode iz objekta upravne zgrade su kanalizacionim cijevima sprovedene do septika. Oborinske vode sa krovova su sistemom horizontalnih i vertikalnih oluka sprovedene do revizionih šahtova, a potom postojećim cijevnim kanalom sprovedene u otvoreni vodotok potoka Mrežnica, koji protiče uz predmetnu parcelu. Zauljene oborinske vode se ispuštaju također u vodotok potoka Mrežnica, nakon tretmana na separatoru ulja i masti. Interne saobraćajne površine su nivelisane oivičene i asfaltirane, dok su pretakališne površine nivelisane, oivičene i betonirane.

Objekt je izveden u skladu sa ovjerenom projektnom dokumentacijom, na koju je data vodna saglasnost, izuzev dislokacije septika i separatora ulja i masti sa monitoring oknom, unutar građevinske parcele. Investitor je priložio garanciju isporučioaca separatora ulja i masti, da će kvalitet efluenta biti u okviru dozvoljenih vrijednosti, propisanim Uredbom. U priloženoj atestnoj dokumentaciji se ne navodi kapacitet uređaja.

U prethodno vođenom postupku izdavanja vodne dozvole je napravljena greška u navedenom broju katastarske čestice na kojoj je izgrađen predmetni objekt, navedeno je 2119/1, a radi se o broju 2159/1.

Na osnovu pregleda dostavljene dokumentacije, utvrđenog činjeničnog stanja i uviđaja izvršenog na predmetnom lokalitetu, a u svrhu smanjenja negativnih uticaja predmetnog objekta i aktivnosti na stanje voda i prava na vode dodjeljena drugim korisnicima, podnosiocu zahtjeva su ovom vodnom dozvolom u tački 3. dispozitiva Rješenja, propisani uslovi kojih se je dužan pridržavati pri korištenju objekta, u skladu sa Zakonom o vodama i Pravilnikom o sadržaju, obliku, uvjetima, načinu izdavanja i čuvanja vodnih akata.

Konstatuje se da je podnosilac zahtjeva, „BELAMIONIX“ d.o.o. Brčko ispunio minimum uslova za izdavanje vodne dozvole za ispuštanje oborinskih onečišćenih otpadnih voda sa lokaliteta objekta benzinske stanice u Plješevičkoj ulici, naselju Kamenica, Gradu Bihaću, te je riješeno kao u dispozitivu ovog Rješenja.

U skladu sa članom 61. Zakona o vodama i odredbama Pravilnika o postupcima i mjerama u slučajevima akcidenta na vodama i obalnom vodnom zemljištu («Službene novine Federacije BiH», broj 71/09 i 102/18) korisniku predmetnog objekta utvrđene su obaveze u tački 5. dispozitiva ovog Rješenja.

Podnosilac zahtjeva je na ime izdavanja ovog vodnog akta izvršio uplatu pristojbe iz tar. broj 43. Zakona o federalnim upravnim pristojbama i Tarife federalnih upravnih pristojbi («Službene novine Federacije BiH», broj 06/98, 8/00, 45/10 i 45/13).

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obradivač akta: Ahmet Smajlović, dipl. inž. arh.

Po ovlaštenju
Rukovodilac sektora za izdavanje
vodnih akata



Nihad Pezo, dipl.inž.građ.

Dostaviti:

- „BELAMIONIX“ d.o.o. Brčko, Cerik bb, 76 000 Brčko,
- ⊖ AVP Sava, ISV – Vodna knjiga
- Sektor 50
- Sektor 40, arhiva
- Oglasna ploča-AVP Sava